

四
書
說
約

四書說約

范陽鹿善繼伯順甫著

門人李湛還白甫

孔心學抱一甫訂

上論卷之一

學而時習章

論語開卷這一個學字是學個甚麼時習是甚麼事
尋嘗論學動以博文為解記誦考究便是工夫却不

知博文離不得約禮離禮言文便不是學到不如依註中明善復初還是其實孔子原有正經註腳則大學之道是也以明德為頭腦以天下國家為著落以誠意為樞柄誠意只是慎獨此外無學也中庸天命之性即明德也天地萬物即天下國家也而戒謹恐懼同此慎獨孔子之所謂學即子思之所謂教也論語動言仁即性也即德也孟子動言心即性也即德也說德說性說天命不似說心更易醒人而又恐人

據當下之人心以為心故又曰良心又曰本心本心乃性也乃德也故虞廷不能不以人心為心而必曰道心政見人之所自以為心多非本心須用精一乃執厥中精一何處用所謂慎獨也故聞見莫非學之功而不實用慎獨之功則考究記誦延平以為玩物喪志謂其於本心實際無干也只這時習章曰悅曰樂曰不愠此何等滋味向非於人所不見之地有內省不疚之功怎得這樣真切這樣超脫豈是考究記

誦摸得着○所學何事自當明白而夫子此章全重
時習蓋本心難昧未嘗不自修持只轉念易乖學而
易厭夫理義悅心原自雋永只為工夫間斷衆妙之
門不開時習則工夫無間本體流行深造自得欲罷
不能悅可知已遠朋就正一脉道氣生民面目當吾
世而重開性命生活得吾徒而大宅天壤之間何樂
可以代此不知不愠更是別有天地非人間誰不知
學原為己非為人知然名根未斷人不知時縱強支

持終有愠意只幾微含怒則學便不足色試把千古
英雄勘到屋漏無言之地要說十分中全無一分為
名的意思恐文王孔子之外未敢多許也夫子論依
乎中庸便說遯世不悔又自謂不怨不尤知我其天
可見這個地位是聖人是君子註解成德二字德者
性也不加不損性分如此性不虧便是德成玩不亦
君子乎揣量骨法自己也愛此章孔子自寫生面三
個不亦却跟一個時習討出弟子不能學者政此時

習○人自生後日被惑憂懼三盤細倒落得個窮也
戚戚達也戚戚苦海無邊回頭宜早就世出世名教
中自有樂地周茂叔教兩程尋孔顏樂處所樂何事
政是洙泗嫡傳無欲故靜是撥開羣陰扶起孤陽的
本領在世界上着落而非逃之虛也時習二字因在
世界上習動中煉性原難所以人多熬不過每每半途
不如逃在世外較易脫灑所謂儒門淡泊收拾不
住皆歸禪氏也聖人強處政在難熬處超然纔得真

性命完全為天地立心為生民立命索隱行怪與道
不遠人兩章政好參看樂從苦中生莫落俗塵尤忌
玄徑○這個學一生只一件生活做不盡默識此
也不厭不倦皆此也志學志此也共學共此也下學
上達即此是下即此是上也朝聞夕死聞此也吾斯
未信信此也自其在物上應的曲當謂之格物自其
徑行了所知謂之致知自其不欺了初念謂之誠意
自其還復了本心謂之正心自其成了個人品謂之

修身隨其居處有高下作用有廣狹如在家上學便謂之齊家如在國上學便謂之治國如在天下上學便謂之平天下心正身修即是中和國治天下平即是位育先看學庸再看論語便醒○仁人心也第二章緊點出仁來又提出孝弟為本煞有意思

其為人也章

仁者萬物一體之本心也人而真一物於度外便非為仁然這個一體之心其通其塞全從事親從兄上

起蓋一本之親尤是生意結聚處此處能忍再不消
講別人了故親親者自然仁民愛物而所厚者薄無
有不薄堯舜之道只算做孝弟論語發為仁條件種
種臚列而說為仁的根本提出孝弟當頭煞有深意
○本字最妙如樹之有根只從此處培養則生意自
然淋漓塞天地橫四海仁覆宇宙祇叫做個孝子悌
弟故此處說個為本是全付精神都灌在上面非直
比別事先幹而已○要明孝弟為仁之本須放下別

念獨自個澄心靜觀討出孩提稍長的知能來不學
不慮天根自露人為甚惜惜忽忽把自家本根一向
埋沒的幾盡本既不立道自何生又何怪做不出好
事○中庸論達孝而言明禮之可以治國即此意論
語每提孝弟作學者功課孟子以入孝出弟為守先
待後孩提之童一章點破真面目仁之實一章總天
下之道而歸之於事親從兄合而觀之旨趣極明不
必又添註脚

巧言令色章

仁者極真懇的一點生意自運自行與於穆之命同
無聲臭巧令二字畫出的然的真相即此外炫心腸
便把自然生意燒斷了○此不是誦諛人乃是粧有
道氣象所謂色取仁也吾人自把無言之地拍一拍
逐日言色可觀處是怎樣來闇然乎的然乎為已乎
為人乎即成象成文悅萬耳而愜萬目與本來性命
有甚干涉

吾日三省章

此纔是真仁者嫡派三省字全是人所不見處用功
忠也信也習也有甚麼一定分數若論人之耳目儘
足打點將去如不就無言之地自為省勘誰曉得他
欠了多少三復此章令人忽然驚覺汗透濕衣○省
字是直入底裏一毫躲不過隱不下然却又是與日
俱新窮無窮極無極曾之日省湯之日新一樣生活
○除了接人處事何處討本性着落除了戒懼內省

何處討復性工夫大學中庸論語孟子總發此理

道千乘之章

五椿兜件件詳來都是求一個心上過的去為國這
樣用心所謂天德王道也蓋千乘在握無一民無一
事不在主心上寄命我一處不盡心國必有受其敝
者敬信節愛時使那椿事不在心上擷算斟酌怎肯
任己之便而不恤國事此即修己以安百姓○真經
濟極平嘗只是個實心做事與人異大凡有國者日

用職掌那個少了一件而逐端查考慮處不妥○高
談心性者付以國事便不理天下那有世事外的心
性省身之下續以治國亦似有情

弟子入則章

此是孔子教條良心人所自具而得力全在實踐上
孝弟敬信愛衆親仁總是力行而學文者亦非枝葉
聞見也蓋此心此理今古所同合千古聖賢之議論
注措始發揮詳盡學文所以為吾行也印其行之所

已合開其行之所未到孟子尚論古人孔子好古敏求同此路數○餘力字活看隨時有空閑處便是不然畢世難盡何以有餘○孔子論學強半指着落處說依他做去纔是實地蓋良心之着落全在事上實事不盡更何言學一會說總數一會說撒數各有攸當然除了撒數沒總數○聖賢經傳原是發人心性之理以為力行之助而後世記誦之學把所載的話頭根原主意全不理會與自己身上了無干涉只在

口裏講面前說這樣學文算不得學文先儒謂之玩物喪志

賢賢易色章

此節說破學字的真解看易色竭力致身有信此於人生來真職分毫無愧色便是天地間一個真學者學而不在人倫上討實際要學作甚麼用○這四椿每靜言思之着實不敢強口學者須要輸心拚死向這上面求足色纔不枉稱學生二字孔廟從祀該用

古來忠臣孝子纔接得這條脉

君子不重章

四段是一套生活反而思之字字中膏肓也威重不
是色莊乃精神內守不如此固不得學固字有趣一
念之忠信人未必無本領全在主字上友不如已過
而憚改是人不能自禁的毛病然這一友這一憚却
是了不得的下場兩個勿字是自己救命的靈符○
要緊生活盡於此劈空點破待有心者上手

慎終追遠章

風俗薄惡原以無所觀感把本厚的德性出亡在外全在為上者以身提醒歸字有景

夫子至于章

溫良恭儉讓是太和之氣孔子學而時習把天與的一點生意葆養渾全根心生色自然如此凡在應接孰不心醉即後來未必能用而傾蓋之間一觸即動天為主而人不與焉許多不濟念頭此時都未及萌

○夫子之求之也是孟子以堯舜之道要湯文法從來無無文法的經傳

父在觀其章

意重觀行邊三年即指父沒說道字便是善而不可改的何必幹旋別意聖人一處話祇單對一個症

禮之用和章

意為後節抑揚說起和原是禮中趣味然豈是外禮而成趣味者知和知字極可惱他自以為得禮之意

遂敢棄禮夫禮和是一件怎生離得不和則不成禮
無禮何處討和晉人放曠都從清談莊老中來便是
他知和處他甚據大道理以濟其自便之私天下人
借為口實大壞綱常此章早已先罵倒深心苦語有
闕世教

信近於義章

信也恭也因也原是好意而往往吃虧似乎天下事
未來如漆意外者只得聽之而非也事越不過理去

理原是可預操的教與免後悔的方兒只在慎始義之所在即未嘗言亦當從事禮之所在敬人處便是起人敬處可親之賢即無因者亦宜以為宗也○此為有意思做好人的說

君子食無章

學字兒影占身子而已說不得好畫一個好學的出來兩無求把人間安身立命的巢穴折了拚性命在事言上下手怕未協於道就正大方何等功夫真實

是好○人生天地原有當盡的性分見得這一路着
急心裏念裏再沒別個可以撓得不繇他不如此故
論語一書全要曉得頭腦則觸處洞然不然為甚麼
貧而無諛章

處貧富是聖門大關頭超出一世全在此而工夫却
是無窮無諛無驕已自有趣樂與好禮更自會心學
者持一生精神狠求進益細一層覺一層之粗深一
步覺一步之淺子貢切磋琢磨之悟破的矣與此等

人言詩字字都中用看來咕嚕之學執滯死板全無
靈氣不足與言○言貧富便是往未言詩便是來告
往知來往中原自有來特人未能知知來纔是醒的
往如於本題外徑無端杜撰一篇議論來却不好而
從前反欲於處富貧外另求一學的道理甚繆

不患人之章

人不知已所失何在已不知人所失何在豈不自明
而人之患却倒用了夫子與他掉個過○名心着實

難冷也不管他中用不中用便儘力患起至於不知人原自不覺從何用患然要曉得關係於已纔肯患上論卷之一終

四書說約

范陽鹿善繼伯順甫著

門人李衷實完一甫

杜允芳湘美甫訂

上論卷之二

為政以德章

德是天命之性民物同體而聲臭俱無者也為政者以之默焉自運便把天下手心都提在手裏○本文

明明為字而從來說無為口不煩言手不煩指天下
自化可是曠曠以德兩字無限拮据只說他主意是
以德耳○看取譬話頭是不下堂而天下治的意思
治天下原不待下堂○日應萬幾何嘗不勞其心是
為天下而非自為其功是濶然而非的然○人自各
具一徹天徹地的靈根只是自不提非民之難化
也中庸一書總發此消息

詩三百一章

從來經書千百其言使亦千百其理則不成經矣作者之意只是一路總向人性命處下手如用兵者正道坦道左犄右角或分或合長兵短兵無非合力以破敵人耳夫子此章唱破六經消息提起萬世窮經者之心持此法看去覺千言萬語都攢歸我心誰想這片無言之地被古人弔拷沒躲處註中感發懲創二語自確

道之以政章

人人都有良心雖汨沒之餘不能滅盡只是有樣子在面前便油然感動自愧其非而自即於善如只迫以政刑彼目中原不曾見心中自不得動徒以規避成頑鈍耳民生三代後不得睹有道聖人遂使本心無自見之期可隕涕矣○德禮非廢政刑政刑亦是德禮但一則文告是憑一則躬修為主○此章即為政以德意

吾十有五章

此是學而時習實錄吾人天命一個至善從起初歸
依於此而中間功夫淺深有日異月不同之妙蓋體
驗愈久本體愈親自然之理也○不惑指學之似是
而非毫釐千里說到此處惡的已沒了只怕善有難
認處蓋天命之性雖極正大又極精微非功深力到
那其間有老大歧路容易溷人○批頭原在天命上
用功只是知字兜到五十時纔敢自許此理原命於
天自然而然是人做作的須還他個自然纔是學

○慈湖論不惑極是陸象山以乾坤易簡為學的規矩便是知天命註疏○耳順者無處非天命也言者不一而聞者能一言者有得失而聞者無疑悟是話到跟前無不立破○從心不踰只是爛熟然歷過多少學力纔全全的天命流行了夫子自描一生所得畢竟有描不出處執定字義揣摩如隔板猜枚水中撈月有甚相干啞子喫黃栢這苦說不得你要知此苦還須尔自喫

孟懿子問章

不是夫子自解幾乎把奉命當孝了三個以禮乃對症之說言踰分奉親不得為孝然此是俗心通病亦不特懿子為然

孟武伯問章

不言如何為孝而以親心告之極有機趣然此必是武伯對症彼寬說者未足語道也

子游問孝章

養自是不可少的特不可不敬犬馬之喻狠絕教人當不住

子夏問孝章

色難二字從虛處下此一拳把人不自覺而不能自強的一條線索兜底提起

吾與回言章

喜他之極撰此文勢然亦見露聰明的是不聰明此道非才鋒智穎所可語也○私要活看只是既講之

後自為運用處以其屬於回之自用故曰私畢竟是
視聽言動孔子看的見處○發字全在蹊徑之外人
看着亦無甚意孔子覺他是發我之言○退後去省
孔子只恁有心人除回外聰明伶俐的都被他看破
本領去

視其所以章

以字易知由字便不理了安字那有於此留心者然
這一個字是人不自覺處不自藏處也須得這雙道

眼是弟子不能學的○察字有別樣眼力從冷處入不用多端便把他本色判定如守一生纔知之算不得察了過後神相誰不會

溫故而知章

溫故知新是尊德性的學問廣大高明精微中庸良知所包原無盡藏向此處用時習之功無處非故物所攝入無時非新機所迸出愈溫愈知愈故愈新故故無窮新新不已可以為師者有本之學纔能提醒

羣蒙也。糟粕俗學窮年故我全無一些靈氣來動得人為不得師。

君子不器章

與上章相連亦似連類。器是憑才質的故有能者便有不能。君子從本性起經綸左右逢原那有拘而不能通之處。○教天下人幹天下事還須自得者能無窮有本者能妙用。

先行其言章

口說到天邊身還坐家裏普天下學者大病孔子把
這個先後替他掉了過有味哉子貢面上微汗○註
中二語原非對待

君子周而章

公私二字極確細體乃見萬物一體原是本性沒來
絲就其中尋幾個偏用其情是甚麼意思君子淡小
人濃淡的寬濃的窄君子不可得見矣遍天地間都
是結私緣耳

學而不思章

千經萬典都是為人心發揮心體無窮境界被他一道盡學而思則合古人於我而以體驗自得思而學則合我於古人而以印證自安夫子說罔殆兩樣斷盡學者病痛

攻乎異端章

天地間原只有個同然是不可不攻是越攻越好的提本來之面目範一世於平康既謂之異端從毫釐

差千里容易混人認賊作子全在此奉此念以往彼假念的神通與正念的神通一般燒天攪地都從這攻之一字上起

由誨女知章

世間事原是知不盡的雖聖人亦然為甚麼不肯自認一個不知即此便是自欺了把知的本體全然失了知字原自有正解只在不昧其心聖人於此喝破雖對證子路而理原如此學者把知字錯解了遂欲

知聖人之所不知聞見愈多覺性益錮豈是小關係

子張學干章

干祿兩字說盡天下萬世學者的心腸聖人與了他
在中之祿把自己一生樞機做成寡尤寡悔性中受
享不比尋常向以為祿須是朝家所予豈知吾身現
在○多也闕也慎也真實修証所謂為己之學原不
是為祿而說個祿在其中是連教帶掃的話

何為則民章

直者貴難枉者獻諛一為君所不樂而便於民一為君所甚睚而不便於民一舉一錯是天地心霹靂手有大主張在是何等為民而民不服不如此人與怨家與仇如何肯服一句不服利害的緊

季康子問章

民俗難強而民性難滅都要從無言之地動他○一介之士持身不苟見者斂容矧主上乎莊不必專論容臨不必坐朝時敬亦非對面時踧踖也孝慈而忠

者見好學好以恩報恩也舉善教不能藉激揚為鼓舞原是提醒人心妙法

或曰子奚章

會得人生道理無學術政事之分只是個素位而行把帝王賢聖都作一路生活看是亦為政奚其為為政微語最可會心

人而無信章

要行得去須人信我要人信我須我可信信字兒不

是才能然其為行之要領比才能更喫緊這個消息
古今不易○細驗來耳目口鼻都是活套東西憑甚
麼令人信我夫未至其間而敢保其必如何只緣着
平生不扯謊耳扯過謊的即偶然是實人亦不信做
人至此寸步難行

子張問十章

綱常是永易不得的即革命之際而此亦必因其有
損益不同政為因此禮耳故損益是因字上逼出來

的不可作兩般看○張也每求難事夫子都說歸易處見天下妙道都是平嘗的○窮則變變則通通則可久此乾坤消息不是人的本領人遊其中為所用耳

非其鬼而章

各用一句考語是眼看這人下出的想是一個人遠鬼神務民義一條勾當○謠字品格低無勇字本領不濟這都是人不肯甘受的而惱其名却居其實要

不是諂非所當祭牽也難上為甚靠前要不是無勇
明見大義挽也難止為甚退後

上論卷之二終

四書說約

范陽鹿善繼伯順甫著

門人杜紉芳洲美甫

宋文儒我醇甫訂

上論卷之三

孔子謂季章

君子於其不可為處斷乎不為不只是一是不敢全是不
忍夫子下一忍字極有意大夫舞八佾是把天地間

頭一等不該的做了從此再無不可做之事孰不二
字有來歷的緊○天下莫大於王王的且僭更不好
僭誰

三家者以章

也不說他不可只就其中點出奚取二字極掃人
興

人而不仁章

此仁字便從忍字作對人只為這點惻然生意難以

欺滅遂做出禮樂來其有聲有色可觀可聽的儀節都是摸寫他心之不能自己處人而不仁誠哉如禮何如樂何也夫子此語道破禮樂的本象令人來認

林放問禮章

天下事實意為本苟無其實繁文愈盛祇增其偽耳老子以為忠信之薄亂之首也政指繁文之禮說夫禮安得為薄特無本則薄耳○人心淳漓世運升降全係於禮人涉世末流以為禮固然耳獨有起而問

本者別具眼界大是有心人關係世教不小故夫子大之而告以本○范氏註極好

夷狄之有章

春秋所以作也語甚傷神不堪重詠○請觀今日之域中竟是何等之世界自諸侯出自大夫出陪臣執國命總因不自天子出來

季氏旅於章

誦祭非鬼的人心十分勝若只以僭論那裏顧得夫

子只就泰山講他一定知禮則旅者之興掃矣然不止掃一個季氏并掃天下萬世之為季氏者所謂片言足以解紛也泰岱有聯來者無福不來者無禍從此出

君子無所章

原是觀君子之射起得興來射是爭的勾當而尚雍容若此就爭上還帶着君子故以君子無所爭領起從射起意而意在射外○味此意夫子之惡爭也甚

言集
矣想君子也切矣

巧笑倩兮章

誰識得禮是後此語極駭末流此見極透本始學者不可無此眼睛○從一後字洩露天機超超玄著一段清談然非清談所可比者彼欲黜禮教而此則探禮原也彼壞世教其心曠而誕此維世教其心真而苦夫子每徘徊二代而夢寐東周就是此一段話說

夏禮吾能章

此章意全在言外觀末句可想蓋此二代乃周禮所
從出也不然要徵他做甚○睹末流之日盛悵本意
之盡失無限情思

禘自既灌章

儀文具而實意衰夫子平生最好觀禮最惱此禮只
照白文看自通似不必惹僭蓋論僭自是僭此處話
且就不誠說何指東說西這樣費解

或問禘之章

講在中庸達孝章不知也原為非或人所及然指掌以言其可以治天下已是說了○禘只是個報本然要報起本來步步推去把天下衆生都關在本裏故曰孝之為道塞天地橫四海漢家帝號都帶孝字極有理

祭如在祭章

兩如在是為禮之敬即自言其意可想夫子以此自盡故每以此觀人天下之不為既灌者寡矣當因之

深省

王孫賈問章

媚字入士大夫之肺腑深矣覽夫子之言如頂門一
灌兩目忽開許多路數若干精神都一時去了○謝
上蔡謂命字知得真少了多少閑思量省了多少閑
氣力此以數言就人一步的話夫子說天只以理言

周監於二章

人見夫千古板說他不從時王之制不知夫子却正

是從周先把周字解明是從二代中來的極得法○
郁郁是彬彬話頭見文中其實有滋味也○觀於此
從周的時賢已與周不相合還讓行古道的是從周
不認的周何以講從也

子入太廟章

問即是禮極其妙解人論禮只以度數夫子却從心
上說所謂無體之禮也試自反於所不知悍然不問
這其間情狀如何是禮非禮○夫子那得無不知即

素學禮而考其文獻未若親炙其法物也安得不問
雖知亦問之註過於尊聖而失其實矣疑問謂與知
之為知之不知為不知是知也語意直截相同誠然

射不主皮章

替他譯一句而歸諸古道見得今不復然無限感慨
意不在一射也全於言外會之○夫子極惱的是力
字這一咏歎便是不語之意惡爭惡力都就射上見
妙趣

子貢欲去章

只說羊無用了誰知大中用人誰似孔子見的深長
吾輩於此等處該進些識見○天下好事不當行而
嘗不亡大抵皆空名所留當其虛有實之用

事君盡禮章

最可惱處莫大於以禮為謫成何人心而世道可知
矣春秋所以作也○哀周時天下大勢只是個無君
而其無君病原只是不認的禮夫子抗住波靡只是

個守住本等○盡禮指儀節說若論其精人安得見之而以為謫春秋之世欺君正在儀節

定公問君章

君使臣事是天建地設的分誼然要沒個真精神貫於其中只憑這舊門面敷衍便把極相關的事體都成流水數了禮是心之敬不肯一念有慢忠是心之誠不敢一念有欺堂廡之間聯為肺腑纔是個君臣

關雎樂而章

只是為后妃之德了便未得宜哀既得宜樂全要識得主腦夫子此語大有意蓋千載男女之情多少淫多少傷豈是說性情中不宜有樂與哀哉只為主意非以德耳○求配望他為風化根原故不可不得有德者今無以關雎之憂樂為憂樂者緣他不省的這關係

哀公問社章

論社以木已非解周社尤杜撰之甚其意或亦欲勸

之立威然事體既未易言而謬解尤非正理故夫子深絕之○就有該陳的大義亦當以正出之如宰子所言純是滑稽家數聖人所極不喜

管仲之器章

心體如太虛應萬物而無迹受萬事而不盈即劬勩奠定冠古燦今亦加不得一毫意氣從來大聖賢窮居說個不損大行說個不加性分原是如此管大夫功儘蓋世夫子嘗極口揄揚而就其間看破他局量

以器小二字定之此全得於色相之外即管大夫亦不自知器大的即無功亦大器小的人即大功亦小這一路學問從天命之性來王佐之外便講不得○儉與知禮之疑只為不敢低看管子故就器小二字轉為模擬夫子雖破他的疑惑而所指事實却又是器小的影神只為消煞不得生平功勞遂如此

子語魯太章

太師是樂的專門夫子却如何弄斧蓋樂的度數算

不得樂樂自有一段真消息所謂元聲也此元聲不在度數外而却不在度數中從人心太和生來胸中沒有太和的難取定準須孔子纔自負知音而陳其來歷云云幾個如字是樂經所不載的乃孔子以已意授他如是如是全於蹊徑外尋之○論樂而如是那樂官是也不知

儀封人請章

從來明王賢相為世間幹功業的不乏然既有位幹

事自無暇發揮大道以開來學人在世間一場事如何得個個分曉就四書中看夫子微言妙語把人自有而不自知的事體宛轉說盡做人生活纔得透露所謂天不生仲尼萬古如長夜也却須得他無位纔得為此是豈偶然儀封人何姓何名有此具眼說是木鐸說是天意原不差○夫子不失人極肯賜教從者見之此時說了許多透心涼的話封人忽然覺他是天差的一個老人○人之心即天也孔子發透人

心知天命也。乞里馬赤之喻，堪與木鐸作對。○天下無道，指人自失其性，說非泛嘗治亂。

子謂韶盡章

兩個聖人的本色，全寫在這樂上。夫子此語是從筆墨蹊徑之外看出，又不實發，如何緣故？只以微語點出。○雍容揖遜，發揚蹈厲，各看都極盛美，合觀便有些不自在的意思。功大者文備德盛者情深，二語甚確。○不止放伐時不大雅，既是放伐的人，則前後總

帶本色即一節亦具全體夫子說他未盡善也是夫
子的心纔覺他未善別人且以為比韶更偉○往嘗
卑論韶此並論武意重武邊而論武意全在以韶相
形昭代大事只露八分便是十分了

居上不寬章

註中本字極好夫子觀天下事都從此處着眼本之
有關即儀文有好處也沒用了○此第三卷都涉儀
言強半探本之論

上論卷之三終

四書說約

范陽鹿善繼伯順甫著

門人侯奉職石臣甫

李定榮曄若甫訂

上論卷之四

里仁為美章

魯無君子斯焉取斯習俗移人賢者不免此自是至
理然孟子去世最近而另作一解豈無所受○孔子

看得仁字十分要緊以為天下除此外再無安身之處故言語決煞乃爾

不仁者不章

約樂之處出此入彼是少不下的而既已處之曰長曰久又是辭不得的今說個不可却怎生了此便把不可不仁的意說透了故仁者安此智者利此都在這塊天理上為活計○以身入世約在約上弄倒樂在樂上弄倒這境界專能撮弄人個個都走樣了人

自有一個入水不溺入火不焚的故物天命之性也此物不失一心嘗惺萬境超然便是孔顏樂處○這塊天理原超脫於約樂之外故處之自不相干又原着落於約樂之中故處之益能自得安之者不容思議矣利之者亦儘透脫

惟仁者能章

萬物一體原是不愛的惡字兒是好字兒逼出來的
的好字兒是惡字兒形出來的惟其本意一樣看承

而人不一樣就合故不得不兩樣施行○仁者固看不見人是張三李四亦不覺已是為張為李只一個大公為主因迫而應故並世而賢奸不相溷即一人而瑕瑜不相掩乃天理之自為淋漓非為已亦非為人也纔算得個能者○好惡是持世的作用原非小關係人人各自以為能夫子下個惟仁者妙哉最可玩味

苟志於仁章

惡之一字其根深其緒多其勢悍滅於東而已生於西強為忍而終橫為決怎奈何得他無了有道於此只在志仁蓋私欲熾時萬難禁御只提起本來天性照一照便冷然自醒狂興索然了故惡非自起乃從本性不現而有之一性當權萬晏瓦解○千萬之惡只是個自私自利志於仁一點生意胞民與物便把惡的根繇絕了

富與貴人章

富貴貧賤是身世大關頭。超凡入聖全在此處所欲。所惡人情不遠不處不去。只為天理良心上過不去耳。靠此一點良心抵住兩般俗念。死掙個君子出來。然說個不去仁是無時可去的生活。蓋富貴貧賤之交我雖打發過去。然非一往而不再來之物。則我之欲惡非一滅而不再生之情。終身攪扯無時無處非其所乘。我一有鬆懈抵隙而入。從前功行盡成灰矣。故君子於仁是終食無違的。即造次顛沛一針不錯。

○看這般用功纔跳出樊籠之外靜若山動若水造化為徒好個君子孔之浮雲富貴顏之簞瓢陋巷孟子大罵受非義萬鍾為失其本心是一脉學問過不得此關休講人品

我未見好章

好惡便是用力於仁無以尚不使加便是用力有力不用而言不足不足因用而後見未見用者故未見不足也○一日二字極提醒人所謂欲仁仁至也特

以此字做考較法百年中無此一日還要賴天乎○
幾個未見極替人發急依夫子說使人皆可為堯舜
人之過也章

仁是本來生意原不可以畦徑求觀過知仁有味哉
孔子原認的仁○過中之仁或是事出無心或是明
知不顧一片真機溢出於意料之所不忍用形迹之
所不忍避千古來多少忠臣義士孝子悌弟都從這
塊地上過光景

朝聞道夕章

人把道看極輕把死看極重道可以不聞死則再沒
可的豈知人生修短不一而無不盡之身有生必有
死如晝之必有夜也貪生怖死達者所笑但醉生夢
死則甚不可耳道者天命之性人之所以為生也乘
此而來當抱此而往不聞道者死真死也生之理已
滅也死又枉死也生之事未畢也知道者但論何時
聞不論何時死本性得現大事已畢生順沒寧說甚

朝暮此個消息紙不能載手不能授口不能傳反而求之必有光景大要孔子為人不聞道虛生虛死出此盡頭話漏盡天機是道何物聞之者便怎樣宗廟之美百官之富還須親自打開門去看○糊塗過百年不如明白過一日明白纔覺是我

士志於道章

不處富貴不去貧賤以為君子存仁實際蓋道心與俗念不容並立普天下心不能存道只是俗根為祟

此根未除所稱志道祇依傍名目耳八字着脚實下工夫處全來不得何足與議○范文正黃蘗賦忠武侯淡泊語王曾志非溫飽纔是家數孔疏水顏簞瓢豈止是要做守貧節義而已受享係其所遭本富者不必強為畱只是本貧者却不可恥其陋貧者士之嘗所耻當隨所志○人疑既是志道何為又耻惡衣惡食然天下却真有這等事且都是這等事一把凡火從裏面隱隱燒起把天與靈根已自燒斷而却猶

貌上粧口裏講儼然自以為有道不悟其質之已非也學者影神被孔子總描在此

君子之於章

一氣說不可作兩截以天下還天下何等自然沒來繇着適莫做甚○義不是無主張的但廓然大公物來順應其或可或否聽其自現不容先以己意安排○義字有許多解特於此章却就無成心一邊講○天下事可否原自現成大半為成心先主遂觀面而

相違故本領在兩無上這兩個字越是擔當天下的
豪傑越不能無○庖丁解牛篇該看天下原有窾會
適莫的刃便要折

君子懷德章

德是天理刑是王法德之所棄刑之所取原是一條
脉路懷德德無限量便要尋向上去上則戀戀難栖
全無超然之意矣懷刑刑有規矩便要尺寸不失惠
則紛然蠅逐全無自守之意矣○天地間兩般大綱

條目孔子家法 ○高皇功令其即德與刑之謂也

放於利而章

放利的人只顧望前走全不回頭看畧一回頭毛骨
悚然便也不敢多怨二字怎禁得起○利原是天下
公物放的人便只見是一己的物夫利既是衆人的
生活放利只得礙着人我從人的性命處礙着怎不
傷心○放字須是奸須是狠須是盡把天下東西歸
於我到此間誰甘得我過

能以禮讓章

指為國的說禮之節文度數尺寸難假而其實原從讓心生出大綱小紀三百三千都以一腔真實謙和灌於其間則朝野臣民共忻悅於太和之宇為國何有不然讓之意既無則禮反為長傲之具無論國即禮亦不相干矣純為據禮以爭者發○為國以禮其言不讓是故哂之與此相發○其實當依左傳解纔於白文合

不患無位章

就人之患下一轉語便成聖學故聖凡原不相遠○
既是患無位却不思位是做甚麼既患不已知却不
思知是知甚麼懵懂可笑○此處且莫提不必有位
不必人知的公案提便是腐儒

參乎吾道章

此等書自問自解不必用註人能忠恕何之不可天
地萬物只憑這點心一齊穿透試一驗之如有不能

貫之處再來嫌忠恕不遲○一言可行便是此意或
以為彼單解恕也夫聖人言語全要活看尋行數墨
毫釐千里矣忠恕二字有時當兩個有時當一個此
處政當一個中庸施諸已而不願勿施於人不在忠
恕違道不遠下乎○聖人恁的直截說後儒猶婉轉
不已只是把聖學看的太高不敢在嘗行中討他却
不知聖人高處政為生活在嘗行中真實着脚不比
懸空解悟你試為之好容易理學大儒個個於此字

費力果其能之一點生意遍滿六合堯舜性之忠恕也湯武反之忠恕也從心不踰自然忠恕也三月不違庶幾忠恕也

君子喻於章

此是分關指總的話聖狂之界原只於此最當先辨○君子小人各極其意之所欲做了一生各有無限條欸不盡情形夫子却從旁總斷一句一壁是喻義一壁是喻利喻字是無言之地自為認取即各人亦

不自覺賴先覺的唱破○君子一生何嘗自全形迹
小人一生何嘗自外名教而君子成就了君子小人
成就了小人都從義利之間分楚漢於不言之處定
從橫南軒以無為而為有為而為分義利象山遡喻
於志恠不得冬月汗出纔知道如今的義都是利乃
一樣生活兩樣主意

見賢思齊章

此書有甚難解只是人無此心○誰不曾見賢一般

也美他而一美之外無餘矣見不賢也嗔他而一嗔之外無餘矣以爲在人的賢否不管我事夫子却要他都管已事則終日隨處感觸無非警覺之資是也得濟

事父母幾章

父母有過子不得比於人須要撥得回轉而用心甚苦用力甚勞不事強持全用感悟有意無言有言不盡之處要父母愛其誠憐其苦而亮其心因以聽其

言舜當時順親必是此道幾者窺其有將然之意也
故下云見志不從彼時埋頭而語各在言外也又敬
不違勞而不怨字字可泣

父母在不章

註字字動人不置不怠無憂無失曲盡

父母之年章

夫子自解甚有意味故曰不可不知不然如知其歲
數而已即不肖之子亦必知之註中愛日字最得

古者言之章

說起來實是可耻從今後不敢大口說話了○此語
眼看今人心想古人口說古人意在今人着力在提
出躬字加上耻字明說今不知耻○夫子也不撰甚
新奇之語往往就人身上勾當冷發一語語甚現成
全非杜撰而意自靈透偏能使人負愧於無言之中
以約失之章

不侈然以自放之謂約極確○切莫學大家手段凡

事收斂自鮮過失

君子欲訥章

言易行難原是大病孔子一生慥慥便只為此○此有一片真精神所謂闇然也四書中此語大同小異數見不厭其重亦為是要緊事耳

德不孤必章

德雖是不易成的然却是人同有的要望他多便難說要說他孤亦非也天下之大豈無知己聲應氣求

白有其人必字決定不誑註中必以類應極確當世
豪傑幾人未有不求相知者此應乃天為之○識度
足以相當不必造詣一一敵體○天地間少此隣不
得靠此隣不小

事君數斯章

註中當去當止有意君臣朋友皆以義合故其事同
亦確

上論卷之四終